

NZAUL

Nzaul sota l revëut de stëiles,
tla sota valedes de umbrià,
o tla longia planadures asnibledes,
danter grossa muredes de piëra -
speve, sulënt, perjunier -
o tla luminënta ziteies de miërmul:
l or y l sanch al incant
ruënt de droghes y plajëi
tl frëit fum dla zigaretas...

Nzaul l sablon ndurà dai raies
dla nrosadura sun l ëur dl mer,
la rë destrata a suié,
l ciaculé dla ondes vërdes;
povester nzaul sota palmes,
te berces de stram y peves:
lat de cëura, svei de puhin,
sëites de laser tl uedl spacà -

y l rauscé dl tëmp...

Roland Verra

(ladin de Gherdëina)

A OSWALD

Cun ti uedl sfragacià me cèles,
l slef dala superbia,
l mus da ladron dessenëus,
y ti medaies rubedes,
y ti mans nsangunedes
sona l tënder strumënt dla poejìa...

Patron de puecia pières ruinedes,
petladëur de grazies, stlet cumediant,
tu dramà, malterjà, aguzìn,
poet assatanà, ana perduda,
tu frut mo eje de mi tiëra
y dla sajons perdudes de la vita...

Roland Verra

(ladin de Gherdëina)

L ciel dl nord ie grisc,
cuntreda de mitel y dlaces,
curida de bosc fosc
y de crëujes de fiër n lingia...

Datrai l corf pëca te viere
y pëta cun si usc desgrazieda;
la sieves autes cun dëibli lampions,
i bastimënc grijes se piërt tl nibl
i se lamënta cun sirenes tramentëuses...

I crëps scherpënc ie na cultrina spëssa
y l orizont n mer de scipa frëida...

Roland Verra

(ladin de Gherdëina)

L ciel dl sud ie tēnder
de ondes dēuces, longes, saledes,
lēnghes, jlefes, uedli linēusc
y juesc pagans te sēlves desmincēdes...

Jēnt viva, recunescēnza dl cuer,
cuntentēza de se sentì n vita,
tiēra de ustoria y daunì,
seves rotes, sarcofags profanei,
y la lampes striunedes dla sēira...

I coi mujiei ie n linzuel lesier
y l orizont nes chērd' y nes stramuda...

Roland Verra
(ladin de Gherdëina)